



Tir Yimyim

www.tiryimyim.in

Regd. No. RNI. NAGAAO/2004/13113. Postal-NE/RN-717.

e-mail: tiryimyim@gmail.com

TAPAK 3

Yangia anidakangma :



Tir Yimyim



tir_yimyim



tir yimyim

TAPAK 8

**Parliament temeja senden ayongba
ya MCC anema lir: Jairam Ramesh**

**Victor Wanyama asaya
nungi anisungzüker**

VOL. XXIII ISSUE NO. 171 (ADOK 171) DIMAPUR AMUNGNÜ (SUNDAY) RONGCHII (APRIL) 05, 2026

₹ 5.00

NH-29 nung Apr 6 atema traffic tetuyuba agütsür

Dimapur, April 4, 2026 (TYO): Commissioner of Police, Dimapur-i April 6 anepdang 6 nungi nikongdang 6 tashi National Highway-29 nung traffic tenokdangba kar agütsüogo.

Iba mapang tsungda National Highway 29 nung Airport Junction (3rd Mile) nungi 4th Mile (Central Jail) Jn tashi aser ano 4th Mile (Central Jail Jn) nungi Four Lane Intersection Over Bridge, Showuba Village tashi gari tulutem mesenzüdaktsütsü ta CP

Dimapur Aotula T. Imchen, IAS-i sangdong ka nung ashi.

Kasa mapang Airport Junction (3rd Mile) nungi 4th Mile (Central Jail Junction) tashi garitem manendaktsütsü aser 4th Mile (Central Jail Junction) aser Old Showuba Town tsungda lenmang külen dang garitem anendaktsütsü.

Nüboritemi item traffic tetuyuba sülen anidaktsü mepishir aser police-i tashi manger garitem atsür aotsü ta CP Dimapur-isa metetdaktsüogo.

Karbi Anglong nung menoknok anak

Guwahati, April 4, 2026 (Agencies): Honibar aonung Assam nung magnitude 3.0 menoknok ka anak ta National Center for Seismology-i metetdaktsüogo.

Honibar aonung 8:23 ako meta menoknokji ali telunglen kilometer 10 irr anak. Iba menoknok tiyongtsüji Karbi Anglong nung liasü ta NCS-isa metetdaktsüogo.

Iba osang zülü tashi nung menoknok ajanga teraksa bentsür aruba mesüra nisung yiruyibongba

osang kecha mangazük.

Yasüing Northern aser eastern Afghanistan aser ano western Pakistan nung 5.8 magnitude nung menoknok ka anakdang Afghanistan nung nisung 8 asü.

Hokolbar aonung 8.42 ako meta Badakhshan province nung 5.8-magnitude menoknok anak ta US Geological Survey (USGS) ajanga metetdaktsüogo.

Iba menoknok anakba ya Delhi aser NCR region densema North India nunga meteta liasü.

Assam-i bendanger election observers arutsü

Guwahati, April 4, 2026 (Agencies): Assam nung Assembly elections agitsü aliba jakdang April 8, 2026 nungi bendanger election observer temi Assam semdangi arutsü.

International Election Visitors' Programme (IEVP) kübok election management bodies balala nungi bendangertem arutsü.

Angola, Bhutan, Egypt, Portugal, Sri Lanka, Mexico, Benin aser Croatia linüktem nungi teshimtet nübotem arutsü ta ketdangsürtemi ashi

April 9, 2026 nü züngsem 126 agi akümba Assam Assembly

election agitsü aser May 4 nü votes azüngtsü.

Bendanger election observer temi April 8 nü Chief Electoral Officer (CEO) den senden amentsü aser dispatch centres o control rooms semdangtsü.

April 9 polling day nung pamoki district balala nung polling stations semdangtsü aser voting procedures, security arrangements aser election technologies amshiba reprangdangtsü.

Iba sentong ya international observers nem India nung electoral maparen inyakba ajangshidaktsütsü atema nükjidong nung agir.

Manipur nung Rengma lanur 2 merenshiba aitsür

Dimapur, April 4, 2026 (Agencies): Manipur nung Rengma nungre ana pua merenshiba khukhua aitsür ta Rengma Students' Union (RSU)-i metetdaktsüogo.

Tena ya Tseminyu district, Nagaland kübok Phenda nung lir aser tena ya yongchak shishilembartem lir ta RSU-i ashi.

Tena March 22, 2026 aonung Imphal-i aodang Kangpokpi District kübok Keithelmanbi aser Sapermeina tsungda mejangjatba nisung kari tena apu ta RSU-i ashi.

Parnoki lanur ana ya tashiyim agi tesem kati anir ao aser idakji pua yur züka merenshi. Iba sülen nisungpurtem jagi tena dang nungi sen aika meshi saja tenati magütsütetba agi merenshi aser

tatem nung tena ket nung aliba sen o mobile phone dena osettem bener ao ta RSU-isa metetdaktsü.

Iba inyakyim ya khukhua aitsür aser ozü züngsemtem dang masü saka lanur shishilembartem aika asoshi lendong lir ta parnokisa ashi.

RSU-isa ozüing amertem dang par züngsem ana dak tashiyim inyakeritem maitsü jangjatsü aser aputsü takhangba agütsüogo.

Parnokisa iba lenmang nung senzür civilian tem talisa shishilembartem aser anogoshi aayangertem kümzüka ayutsü takhangba agütsüogo.

Ozüing amertemi mapang shitak nung meinyakra onoki ozü züngsemtem kümzüka ayutsü atema maparen inyaktsüsa akümtsü ta RSU-isa metetdaktsüogo.

Koridang by-election atema Apr 7 nü nüboyimba tembangtsü

Dimapur, April 4, 2026 (TYO): 28-Koridang (ST) Assembly Constituency by-election atema nüboyimba maparen April 7 nikongdang 4:00 ako nung tembangtsü ta Mokokchung Deputy Commissioner & District Election Officer Ajit Kumar Verma, IAS-i metetdaktsüogo.

April 9 nü polling asütsü jakdang ghonda 48 tsungda public campaigning kecha malitsü. Iba tetuyuba nung public meetings, rallies aser

processions dena lir. Maneni television aser iba mesükba devices densema electronic media ajanga election dak sendakba osangtsüsang prokshiba noktanger ta Mokokchung DC & DEO-i metetdaktsüogo.

Iba tenokdangba nungsa voters atsür arutsü atema musical concerts mesüra theatrical performances amala entertainment sentong agiba dena lir.

28-Koridang (ST) Assembly

Constituency nung register süa maliba nisung ajak nüboyimba maparen tembangba sülen iba constituency toktsür aotsüla ta Mokokchung DC & DEO-isa ashi.

Item tenokdangbatem den ainer ajak nüboyimba maparen temli constituency toktsür aotsü maparen ajak Returning Officer, Assistant Returning Officers, magistrates, police aser security personnel-i inyaktsü nungloktsür ta paisa metetdaktsüogo.

NBSE-i Class IX nung lisopur oshi 12 talila sayutsü

Dimapur, April 4, 2026 (TYO): Nagaland Board of School Education (NBSE)-i academic year 2026 nungi Class IX nung lisopur oshi talila sayutsü.

NBSE-i Class IX atema lisopur oshi 12 talila benoktsü aser iba ajanga school curriculum nung lisopur oshitem teimba akümer.

Iba asoshi Department of School Education nungi temelaba nguogo ta NBSE Secretary &

Chairperson (Additional Charge) Rangumbuing Nsarangbe-i ashi.

NBSE-i Class IX atema oshi talila bendenlokbaji- Chokri, Chang, Kuzhale (Khezha), Konyak, Kuki, Rengma (Nzonkhwen), Rengma (Nthenyi), Phom, Pochury, Sangtam, Yimkhiung aser Zeme lir.

Tang tagidak oshitem Ao, Lotha, Sütsa aser Tenyidie den külemi oshi talila 12 sayutsü aser

shilem balala lemsar mapa tenzüksü ta NBSE-i metetdaktsüogo.

NBSE portal nung syllabus aser iba dak sendakba osangtem metetdaktsütsü ta parnokisa ashi.

Oshi shia atema "A Comprehensive Course in (Language) for Class IX" ta ser textbooks amshitsü aser ibaji pei pei literature boards-i ajanga adoktsü ta NBSE-isa metetdaktsü.

Dimapur DC office nung anogo pezünü mapa meinyaktsü

Dimapur, April 4, 2026 (TYO): Dimapur Deputy Commissioner office tiptema belentsü atema April 6 nungi 9, 2026 tashi official mapa meinyaktsü.

Iba osang ya Commissioner, Nagaland, Kohima nungi temelaba anguba sülen metetdaktsür ta Deputy Commissioner, Dr. Tinojongshi Chang, NCS-i ashi.

Deputy Commissioner, Dimapur office ya Survey Training Institute (STI), Purana Bazar, Dimapur-i belentsü.

Temalen shia aliba anogotem rondak mapa dak alaka tanga

maparen kecha meinyaktsü anungji nisung ajaki amalitepa yariteptsü mepishir ta DC Dr. Tinojongshi-isa metetdaktsüogo.

April 2, 2026 nü Dimapur Deputy Commissioner office tasen yanglutsü atema nüngshilung azüngba sentong ka agia liasü.

Iba sentong nung MLA & Central Administrative Works Department (CAWD) and Taxes Advisor Kudecho Khamo, MLA & Industries and Commerce Advisor Hekani Jakhalu aser MLA & Labour & Employment, Skill Development &

Entrepreneurship and Excise Advisor Moatoshi Longkumer nung aden.

Shitakba agibo iba sentong nung Chief Minister Neiphiu Rio adentsüba liasü saka pa ajungbena Union Finance Minister den ajuruteptsü atema New Delhi-i aoba ajanga CAWD Advisor Kudecho Khamo-i nüngshilung azüngtsü.

Dimapur Dimapur Deputy Commissioner office tasenba ya 2-storey office complex ka asütsü aser küm ana nung Rs 14.97 crore endoka yanglutsü sentong lir.



April 3, 2026 nü Kohima nung Mary Help of Christians Cathedral nung Good Friday amungdang Cathedral Catholic Youth Movement ajanga Passion of Christ ia sayuba noksa nung angur.

Ao Lanur Telongjem Chumoukedima-i Naga Cemetery merektet



Dimapur, Rongchii/April 4 (TYO): Ao Lanur Telongjem Chumoukedima (ALTC)-i kümshia lokti atema nübutzüka mapa inyakba nung shilem ka ama taküma züngsemtemi Naga Cemetery merektetsüogo.

Taküm iba sentong ya Yangerinla Ao, Bendangla Jamir, Lepzungsangla Pongen, Imtinenla Ao, aser N Amongla Ao nung biletetba temaitsü ayongzüka agiogo. Item senti takümetem ya taküm January 31 nü bus tsükokba lendong ka nung taküm sama-a liasü.

Iba merektetba sentong nung ALTC züngsem ajak agi 150-i shilem agi, koba Good Friday anogomung den denchitepa liasü. Iba anogo ya tamanger

atema bendanga agütsüba, taküm alangzüka aser timla agütsüba anogo ka lir.

Iba sentong nung Ao Baptist Church Chumoukedima Pastor Dr. Imtisangba Ao-i sarasadem aser sentepa aliba lokti ajungshia liasü. Pai asürtem nem tetushi agütsüba den Good Friday osang tajung lemsatepa liasü.

Kasa mapang nung ALTC tir Talisunep Walling-i, iba inyakyim ya lokti atema khuret abenba aser tamangba naprongla dak sendaka lir, ta ashi. "Asenoki temeibattem biletetba tesem merektetba mapang asen mulunga tenüngsang agütsüba agi merekteter. Tanü asenoki asen adianutsürtem mapa tajung

asoshi parnok nem tetushi agütsür, shirnok taküm ajanga asenok maneni ajungmesor," ta pai ashi.

Paisa, iba sentong nung shilem agiba atema Ao Seno Telongjem Chumoukedima, Watsu Telen Chumoukedima, Ao Students Union Chumoukedima Chumoukedima nung nema tenüngsang agütsü. Maneni pai, Chairman, Lhousito Khro-i anir Chumoukedima Town Council-i pei mapang agüja merektetba sentong nung shilem agirtem nem süngojemtsü agütsüba atema kanga pelaba lemsatep.

Kümshia iba amala mapa balala benoka inyakba ajanga lokti ajangzükdaktsütsü asoshi ALTC bendanga agütsür aliba sayur.

Conrad-i Boko-Chaygaon nung NPP rally nung shilem agitsü

Guwahati, Rongchii/April 4 (Agencies): Meghalaya Chief Minister aser National People's Party (NPP) tir Conrad K. Sangma-i April 6 nü taruba Assam Assembly election atema Boko-Chaygaon Assembly constituency kübok Bongaon nung party nüboyimba sentong nung shilem agitsü.

Iba nüboyimba sentong atema Santi-Nijora Club meeting hall nung renemdar, kong party lenirtem aser sentong ayongertem sendaktepa renemkonemdar. Constituency nung NPP pur tashi tashi itshidaktsütsü atema iba sentong ya kanga dang tongtubang asütsü.

Party lenir tejen Bajengdoba MLA Pongseng R. Marak, National Vice-President I. Hemochandra Singh, aser Boko-Chaygaon candidate Ganseng B. Sangma nung iba tesem

semdanga inyakyimtem asadangogo.

Party source balalai ashiba agi, iba sentong nung NPP lenirtem aser Meghalaya nung aser tanga state nung MLA temi shilem agitsü imlar, koba ajanga iba party ya national party ka ama atsülanga aoba sayur.

NPP lenirtemi ashiba agi, iba sentong nung Assam asoshi party sentongtem metetdaktsütsü, koba iba tesem nung party-i taliba shilem agitsü aser state nung party inyakyim atsülanga aotsüba dak rangloker lir.

Sentong ayongertemi ashiba agi, iba sentong ajanga party kübok inyakeritem tali tashi itshidaktsütsü aser election matong tsüngda talisa Boko-Chaygaon constituency nung voter tem den sendaktepa inyaksü asoshi maongka agütsütsü.

Assam Rifles-i sentong balala ayongzüka agi



Dimapur, Rongchii/April 4 (TYO): "Friends of the Hills," inyakyim kübok Assam Rifles-i maneni lokti aser lanurtem ajangzükdaktsütsü atema bendanga agütsür inyaka arudar.

Iba inyakyim dak sendakba nung Assam Rifles-i PM SHRI Government Middle School, Peren Town nung special outreach sentong ka ayongzüka agia tanurtem nem tenüngdakba stationery aser tanurtemi chinüba chiyongtsütem lemja liasü.

Sentong nung Assam Rifles sepaitemi kaket, notebook, pen, pencil, eraser, sharpener aser tanga tenüngdakba stationery tem densema tanurtem shisaluyim nung nüngdakba oset balala lemja liasü.

Iba sentong ya school nung dang agi, aser iba ajanga kaketshirtem ajaki shilem agiteta liasü. Iba inyakyim tajung ya PM SHRI Government Middle School nung tesayurtem, tsürapurtem aser Peren jila nung alirtemi kanga pelashishia agizükogo.

Assam Rifles-i shisaluyim ajungketba aser kinük nung aliba tanurtem maneni nongita yariba atema sentong nung shilem agirtemi parnok danga kanga pelaba lemsatepogo.

Nagaland Education Department-ia iba inyakyim ya kanga pelashishia agizükogo, koba tekübokba jenjang nung shisaluyim ajungkettsü atema kanga dang tongtubang lir.

Tsürapur aser jila nung alirtemia tanurtem ajangzükdaktsütsü aser lokti jenjang tajungba kümdaktsütsü

asoshi iba amala jenjang tajung agiba atema Assam Rifles dang kanga pelaba lemsatepa liasü.

State kümzüka toktsütsü atema jenjang tapet agiba dang masü saka lokti liba aser shisaluyim ajungkettsü atema-a jenjang tapet agiba atema parnok AR dang kanga pelaba lemsatepogo.

Kasa mapang nung Assam Rifles-isa, Good Friday anogo humanitarian outreach sentong ka benoka inyaka Kohima Orphanage & Destitute Home, Bright Morning Star Children Home aser Tabitha Enabling Academy, Kohima nung nem tenüngdakba teyari tenla agütsüogo.

Lokti ajungkettsü asoshi AR bendanga agütsür aliba nung shilem ka ama iba sentong ya ayongzüka agia liasü.

Parnoki agütsüba osettem rongnung item kidang alir tanurtem anogoshi amshitsü nüngdaka aliba osettem densema lir. Maneni AR-isa, tanurtem, beneficiaries aser riju balala nung staff tem den sensaksem mapang tajung agia liasü.

Iba inyakyim tajung ya item riju nung alirtem aser achayangertem ajaki kanga pelashishia agizükogo, shirniki mapang shitak nung teyari agütsüba atema Assam Rifles dang kanga pelaba lemsatepa liasü.

Ibala inyakyim ajanga security dak dang masü saka nüburtem den tesendaktep akangshitsü atema AR bendanga agütsür aliba sayur.

Nüngtugu Clinical Oncologist Dr Yesmin Nureja-i PIMC semdang



PA Sangma International Medical College semdangba mapang Dr Nureja-i MBBS kaketshirtem den sensaksema la tajangshibattem lemsatep.

Dimapur, Rongchii/April 4 (TYO): University of Science and Technology Meghalaya (USTM) kübok aliba riju PA Sangma International Medical College and Hospital (PIMC) nung Honibarnü, Apollo Cancer Centres, Teynampet, Chennai nung Consultant Clinical and Radiation Oncologist Fellow (Clinical Oncology) Dr Yesmin Nureja MBBS, MD den sensaksem sentong ka agiogo.

Dr Nureja-i PA Sangma International Medical College nung MBBS kaketshirtem den kanga tajangzüka ka-a sensaksemogo. Lai oncology dak sendakba nung la tajangshiba lemsatep aser iba ajanga cancer diagnosis, radiation therapy, multidisciplinary cancer care,

aser tawa tanü oncology inyakyimtem indang tangazükba aika agütsü.

Laisa, cancer agi shirangertem ariabilema anepalutsü aser kuli dak amendaker aliba mozütem amshitsü koda tongtubang iba indang lemsatep. Iba sission ya kanga dang mazüngi sensaksema agiogo aser kaketshirtemi tasüngdangba balala asüngdangba den sensaksem nunga kanga junga shilem agia liasü.

Kaketshirtem den sensaksem sentong tembangba sülen Dr Nureja-i PIMC nung nursing staff tem den sensaksema liasü. Lai oncology care, patient counselling, aser supportive treatment nung nurse temi koda tongtubang shilem agir,

iba indang lemsatep. Laisa, nurse temi bendanga agüja inyakba atema parnok nem tenüngsang agütsü aser specialised cancer care dak sendakba nung parnok skill tem maneni arangtetsütsü ajungshia liasü.

University of Science and Technology Meghalaya (USTM) ya 2011 küm amenok aser iba ya North East India nung Science and Technology dak sendakba nung state private university mezüngbuba lir. University nem National Assessment and Accreditation Council (NAAC)-i 2021 küm 'A Grade' agütsüogo.

Kasa mapang nung P.A. Sangma International Medical College ya 2024 küm amenok aser MBBS kaketshirtem tanabuba batch züngdar.



April 04, 2026 nü Chennai nung Ato kilonser, Narendra Modi-i ken mejemer, Ramesh Vinayakam den par kibong züngsemtem ajurudang tangokba noksa nung angur.

Totzü agi anüingba olulu state sorkartemi nokdangtsüla: Centre

New Delhi, Rongchii/April 04

(Agencies): Honibarnü Centre sorkari state sorkartem dang petrol aser diesel totzü agi anüingba olulu nokdangtsüla, ta metetdaksü.

Centre sorkarisa sensotem danga, Strait of Hormuz shibangba ajanga tetsüdaksü ajangshiaka India nung petrol, diesel aser LPG peria rizünga lir, ta metetdaksü.

Ministry of Petroleum & Natural Gas-i sangdong ka ajanga, petroleum products aser gas agi nüburtim tim-matemsüsa sorkari inyakdar, anungji olulu masü saka sorkari official sangdong agütsüba ang amangtsüla, ta metetdaksü.

Sorkari kibongtem, hospitals aser nüngdakba service balala atema domestic LPG aser piped natural gas (PNG) supplies peria rizünga lir, ta metetdaksü.

Nijai totzü rizünga ayuba aser 'black' nung ayokba sorkari nokdangter aser LPG distributors 1,000 nembo show-cause notices agütsüogo aser tang tashi nung dealerships 27 bo anentsüogo, ta sorkari metetdaksü.

Tang alima tensa ajanga timtem ajangshiaka India nung distributor points nung LPG agi anüingba osang mali. Hokolbar kija nunga cylinders lakh 51 agütsüogo.

Iba dak alia demand ajemtsü

atema kerosene aser mijanga amshir.

Natural gas dak sendakba nung sorkari, kibongtem aser transport sector atema supplies peria lir aser industrial den fertiliser sectors atema supplies tali agütsüdar, ta metetdaksü.

Ministry-isa, refineries ajak nung mapa inyakdar aser linük tesem ajaklen petrol pumps nung totzü peria lir, ta metetdaksü.

Alima nung totzü jenjang atuba nungi nüburtim khu pungbadaksütsü atema sorkari petrol aser diesel nung litre shia nung excise saru sen 10 ajemogo aser tangaleni diesel aser tayimtsü totzü yokba nungbo saru tuogo.

Parliament temeja senden ayongba ya MCC anema lir: Jairam Ramesh

New Delhi, April 04

(Agencies): April 16 nungi April 18 anogo tashi Parliament temeja senden ka ayongzükba ya election model code of conduct MCC) anema lir; Tamil Nadu aser West Bengal nung assembly election nung tajangzük angutsü atema BJP-i tetsürtem quota bill ya amshitsü meranger, ta AICC otongdar, Jairam Ramesh-i metetdaksü.

Kanga aritepa Parliamentary menden teimba akümtsü atema benokba ya Congress-i anemer, ta paisa metetdaksü.

Iba ama telemtetba ajanga talisa Tamil Nadu aser Kerala ama south tsütsülen aliba state tem takoksa angutsü; iba ya ajanga north-east nung aliba state tem aser Punjab ama north-west len aliba state tem takoksa

angutsü, ta pai metetdaksü.

Modi sorkari delimitation ozüing ka atema jembidar aser Lok Sabha o state assemblies nung menden shilem 50 tali bendenloksü atema jembidar, ta pai ashi.

Uttar Pradesh aser Kerala na tetshia Ramesh-i, UP nung Lok Sabha menden 80 aliba nungi 120 akümtsüa akok aser Kerala nung menden 20 aliba nungi 30 akümtsüa akok aser tamalen menden 60 aliba nungi 90 akümtsüa akok, ta ashi.

"Opposition-i longjemer iba ya anema nokdaksü. Yimtenren party tem tsüingda telemsa adokdaksütsü atema sorkari yangluba asalentongji tamakok angutsü," ta pai ashi.

Anogo ishika tejaklen sorkari kanga tongtibang Bill ka

benoktsü atema April 16 nungi Parliament nung temeja senden ka ayongzük, ta metetdakja liasü.

Lok Sabha menden tang 543 aliba nungi menden 816 tashi akümtsü atema sorkari bill ka benoktsü aser taruba Lok Sabha election aser assembly elections nung tetsürtem nem menden shilem 33 lemzüktsütsü atema bill ka benoktsü.

Parliament nung item bill agizükra tang Lok Sabha nung menden 543 aliba nungi menden 816 akümtsü aser iba nungjagi tetsürtem atema menden 273 shiteta yutsütsü.

Parliament nung item Bill ji pusemdaksütsü atema Home minister Amit Shah leniba nung sorkari opposition party tem den jembishinü tenzükogo.

Congress aser BJP nati Puducherry nem state jenjang magütsü: Vijay

New Delhi, April 04

(Agencies): Honibarnü Tamilaga Vettri Kazhagam (TVK) party nung tongti lenir Vijay-i, Centre nung Congress sorkar aser BJP sorkar mapang talangka liaka parnoki Puducherry nem state jenjang magütsü, ta metetdaksü.

Puducherry Union Territory nung election nüboyim sentong ka nung jembidang Vijay-i, "Centre nung mapang talangka sorkar menden nung liaka Congress mesüra BJP napronglai Puducherry nem state jenjang magütsü. Lieutenant Governor nem mamoshidaksütsüsa TVK-i Puducherry state jenjang atema inyaksü," ta metetdaksü.

Puducherry ya taoba mapang French colony ka liasü. 1962 küm nung ang Puducherry ya official süa India den aden aser küm ka lir Union Territory jenjang agüja liasü.

Vijay-isa voters dang TVK maitsü "whistle" pusemang, ta mepishi.

Region nung teloktep anaprong aija Vijay-i, "Ruling All India NR Congress (AINRC)-BJP teloktep ya tashi lulaba

teloktep ka lir. Tamil Nadu nung ama Puducherry nunga opposition DMK-Congress teloktep ya ratamataba teloktep ka lir," ta ashi.

Paisa, TVK-i takok ngura sorkar akümba sülen ita trok tsüingda local body elections ayongzüka agütsü, kibong shia nem medical insurance sen lakh 25 agütsütsü, below the poverty line (BPL) kibongtem nem ita shia electricity unit 200 angati agütsütsü aser Puducherry University of Applied Sciences & Arts amenoktsütsü, ta nangzük.

TVK party ya 2024 küm February ita nung tenteta liasü. Taruba election nung parnoki UT nung aliba constituency 30 nungi 28 nung tokteptsü, aser tanüingba menden anaji Neyamakkal Kazhagam (NMK) nem agütsüogo.

Puducherry legislative assembly nung züngsem ajak agi 33 lir, ajisüaka menden asem atema züngsemtembo Centre sorkari shimer.

Puducherry nung April 9 nü election agütsü aser May 4 nü Assam, Kerala, Tamil Nadu aser West Bengal state tem den külemi vote azüngtsü.



April 04, 2026 nü Murshidabad nung Berhampore constituency nungi Congress candidate, Adhir Ranjan Chowdhury-i West Bengal Assembly elections atema nüboyima jajadang tangokba noksa nung angur.

West Asia rara nung India nunger aika süogo aser yiruogo

New Delhi, Rongchii/April 04

(Agencies): February 28, 2026 nü West Asia nung rara tenzükba sülen tesüiba ita ka tsüingda India nungera aika süogo aser aika yiruogo.

Hokolbarnüa Abu Dhabi nung missiles ka anüing tom nung nokdangtetba sülen tejaksa tsükba lendong nung nisung 12 yiru, aser parnok rongnung India nungera parnok pongu densema liasü, ta ketdangsertemi metetdaksü.

West Asia nung tang tesüsa March 28 nü India nung ka Kuwait nung asü, ajisüaka tang tashi nungbo nisungba maitsüji mesangdong.

March 24 nüa India nung ka UAE nung missiles tejaksa tsükba agi kongshia asü aser March 18 nüa Saudi Arabia nung Iran nung missile tejaksa tsükba lendong nung India nung ka asü, ta Indian Embassy-i metetdaksü.

March 13 nüa Oman kübok

Sohar yimti nung aliba Al-Awahi industrial area nung drone ka tsükba lendong nung India nung ka asü aser India nung 10 densema nisung 11 yirua liasü. March 12 nüa Iraq nung Khor Al Zubair port anasa bomb bena aliba rong kati US nung tanker Safesea Vishnu amakba lendong nung India nung ka asü.

Gulf of Oman nunga totzü abenba tanker Skylight amakba lendong nung Bihar nung Captain Ashish Kumar aser Rajasthan nung Dalip Singh asü.

West Asia nung rara adokba sülen India nungertem rongnung mezüing asübaji Dixit Solanki liasü. March 4 nü Oman züyimkümlen bomb bena aliba rong kati tanker MKD VYOM amakba lendong nung Solanki asü.

West Asia nung rara adokba sülen tang tashi nung nisung 2,700 dak tali süogo, aser asürtemji teimbaka Iran nungi lir.



Agra, April 04, 2026: Agra nung tzüinglu aser yipru agi wheat lu raksatsür alidak aluyimer kati wheat tsükjung bendenba noksa nung angur.



TIR YIMYIM YIMOBILEM (EDITRIAL)

DIMAPUR SUNDAY, APRIL (RONGCHII) 05, 2026

Tsüngremi jembiba o

Yisu sür külen Par nütsüngtem tetsübu aser terata nung liasü. Parnoki Paji Israel nungertem bendanger yimli kübok aliba nungi kümzüksü aru ta bilem saka pa süa adok nungji, parnok teimla ajak samar kodamasüba tia ka nung parnok kimaia madokteti ki telong nung atsüoka liasü. Pa taküm alidang, Pai parnok tsüngdang sayatenya mapa inyakba aser parnok dang Pa sür shia arutsü indang jembiba ajak to amadoker liasü. Parnoki Yisu shia arutsübaji teimlaa meimla. Ibayongji, nütsüngtemibo Yisu leper reprangdangi aotsüa tebilema mebilem. Iba ama mapang ka nung, Yisu sür tasemnep Deobar anepdang yakta tetsür kar teronem menemba bener Yisu rema yutsüdak leper semdangi ao. Atangji, nütsüngtem dang nungibo item tetsürtemiang Yisuji temeimba miem ta iba mapa jagi kuli sayur. Ajisüaka, parnokia Yisu shia arutsüba indangbo mamang. Ibayongji, kodang parnok Yisu mang leper nung mangu parnok rataa adok. Iba ama mapang ka nung parnok Yisui ashiba ama Pa shia arutsü ta amanga ali asübo, ratatsü melen tepela agi memeteti ola tuluka adoker lila. Iba amaji ratamataa alidang, kotak tenyari Yisu shia aruba osang sangoktsü aser Yisu taküm alidang pa sür asembuba nung shia arutsü ta ashiba otem nenshia metetdaksü. Idangji dang tetsürtemia Yisu taküm alidang jembiba otem bilemtet aser amang. Ajisüaka, tejashitsüka, tetsürtemi leper nungi meyipa orr Yisu shia aruba osang tejangja bener arua shiaka, nütsüngtemibo mamang. Iba kasa anogo nung, nisung ana Yirusalem nungi Emmai yimtaki ooya alidang, Yisua tena anasai aru aser par asem külemi ao. Tenajia taoba anogo asem - pezüka tsüngda Yirusalem nung Yisu pua kangki nung angenlokba indang jembiba oya liasü. Atangji, tena jagia Yisuji Israel nung kümzüksü asoshi aruba Tsüngrem chir liasü ta amanga liasü. Ajisüaka, süa adok nungji parnoka terata tia ka nung liasü. Parnoki Yisu asübaji mangatet, anungji Pa shia arutsübajibo teimlaa meimla. Ajisüaka, Yisui tena mulungjang nung shisabolua telangzüba ka aginüa tipmedemi alibaji angu. Aji oda, Yisui Pa nütsüngtem tamang aser teimla ajak samar terata tia nung alibaji meteta dang liasü. Iba ama terata aser tetsübu tia nung alidang, Yisui Emmai yimtaki ooya aliba nisung ana dangji Laishiba nung shina aliba ajak rateta ashi. Aji oda, yim tonger külen, kodang tenati tena den aruba nisungba to Yisu liasü ta reprangtet, parnok tepela nung tasü itshir, yangji yongyima meliteti iba aonungjisa Yirusalemi meyipa orr, nütsüng terka den parnok den sentepa aliba medemertem ajak dang " Kibuba atangji shia aruogo" ta metetdaksüba asenoki Luke 24 nung shia angur. Asenok taküm nunga aiben Tsüngremi moatsüba aser yariba ajangshiogo. Ibaji dang masü saka asenoki tangar taküm aser kibong nung Yisui taochi mapa tulu inyakba sayatenya mapatema nguogo. Ajisüaka, alima nung alir asünungji, ken ken asenok taküm nung tamakok angudang, manemshilu aser asü ama lendong agi atongdang, asenoki Yisu sür shia maru amato bilemer. Tetsürtemi Yisu shia aruba osang shiaka nütsüngtemi mamangba amato asenoki Yisuji asenok den mali amato bilemer, kechiyong Paji asenok tenük agi mangur. Ajisüaka, Yisui asenok shisabolu aser terata tia nung alibaji meteta lir. Asenoki mamangba aser rataba atema Pai maitsür kechiyong Pa temeim aser taohiji asenoki Pa dak mangmangba temenen dang nungi tuluba. Aji oda, asenok den Tsüngrem mali ama bilema alidang, Yirusalem o Emma yimtsüng na tsüngda nisung ana shisaboluseta jajaya alidang Yisui tena anasa oagi külemi ao ama, tanüa Yisui asenok mangmangba purtem aser asenok atsüngzüka aoba purtem bushia arua jembir. Pa shia arur külen, Pai o tasen ka mejembi saka Pai Laishiba nung aliba indangang angatetdaksü aser Laishiba nung shia aliba otemji angatettsü asoshi Yisui nisungtem mulung lapoktsü ta Luke 24:45 nung shia angur. Ibaji tanü asenok asoshi kanga tongtibang lir. Tanü shi nung Yisu asenok den mali, saka Tsüngremi jembiba otem Laishiba nung shia alinungji, ibaji angatettsübaji asenok atema kanga tongtibang lir. Atangji, Yisu shia aruogo. Ajisüaka, asenoki Laishiba mezügra aser yangji shia aliba mangatetra mesüra mebilemtetra, Yisu shia arubaji asenok atemabo amajok asütsü. Yisu süogo, Yisu shia aruogo aser ano Yisu tanaben asenok dangi arutsü. Ibaji Lashibai ashir. Ibaji angatettsü asenok mulungjanga lapokjang ta Tsüngrem dang sarasademdi.

OLEMSABANG

YISU SHIA ARUBA OSANGTAJUNG

~ L. Kika Pongen

Küm merijang ana dak tali ogo....Tanüp ya Yisu shia arur külen; pai mezüngbuba kanga dang tongtipang o asem pa tembartem aser nutsüngtem den jembiba angur....Item o-tem nungjagi asenok asoshi tangazüksü lesson kar shisadangdi.

1. Na kechiba ajeper ? (Yohan-20:15) Mari leper nung jepa nokdaka alidang Yisu-i la dang asüngdangba o ka lir....Tanü asen lima nung kija, kibong aser nubur aika tajepba tia nung lir...Lanurtem aika pei taginuba nukjidong metongteti, teimla samar tajepba tia nung lir; kibong aika apuani tsüngda temeim mekongka kümer; chirnur khuret agi; karbo makamait sensak tia agi tajepba tia nung lir. Tanü asen Naga nung nurburtem nujiso aginua tajepba tia nung lir...Arung asenoki shia aruba Yisu ajurudi aser pa dak teimla yudi....Surabangla, pai asenok tajepba nuktzü agi tepela nuktzü melentsütsü.
2. Ajak junga liang (Mathi-28:9). Yisu-i Pa nutsüngtem dang ashiba o ka lir...Tanü asen lima nung sorkar, yimden, arogo aser loktiliba ajak nung ochi agi kanga anungakonger...Tanü asen lima nung ochishir yimsusur, lennir tajung maliba agi asen lima kanga mejungi raksa-a lir. Arung asenoki shia aruba Yisu ajurudi aser pa den asen khuret lemsatepdi....Surabangla, pai asen yimden, arogo aser loktiliba ajunga junga kümdaktsütsü.
3. Nenok den tesunep liang (Yohan-20:19). Yisu-i nutsüngtem dang ashiba o ka lir....Tanü asen lima yimjung aser tesunep agi kanga anungakonga lir....Sorkar aikati yimsu asüba; temelen saru (tax); saru-saji tapu-tapu saruba; auyaba; rakzükraktemba; nisungpua bener aoba; iba amala mapatem agi sunga lir. Kinuk ajaklen nubur ajaki ola atokbaji yimjung aser tesunep aginur. Arung asenoki shia aruba Yisu ajurudi aser pa dak chichia amangdi...Surabangla, pai asen lima sunepa kümdaktsütsü.

Yisu shia aruba ajanga Pa dak amangertem medendaktsüogo aser teimla agütsüogo :

1. Yisu shia aruba ya Tanela (Spirit) ka shia aruba masü...Pongmang, mangdang nung, mesura yimdangi aruba (Vision) ka masü.... Yisu-i nutsüngtem dang ashi...."Kü teka aser kü tetsüng ajiang; ibai atangji ni; kü dak kongshiang aser ajiang; kechiaser tanela ka dak shi aser teret mali" (Luke-24:39-40). Ano Yisu-i nutsüngtem dang Ango (Fish) tamen temelang ka meshia achiba angur (Luke-24:42-43). Tanela kati mesura pongmang, mangdang aser yimdangi aruba kati chiyungtsü achitsü makok.
2. Yisu shia aruba ajanga pa dak amangertem nem tekümtet (Salvation) aser teti taküm senmang (Eternal life) renemtsüogo...."Tanaben shia aruba aser taküm ni; shibai kü dak amangdir pa suaka taküm alitsü" (Yoh-11:25).
3. Yisu shia aruba ajanga pa dak amangertem medendaktsüogo...."Khrista shia marura ozü sayutsüngiba amajok aser amangba-a amajok" (1 Korint-15:14). Yisu shia maru asübo asenok amangba ya amajok sula...Saka Yisu shia aruba ajanga asenok medendaktsüogo.
4. Yisu shia aruba ajanga tasüba temenen madak takok nguogo..."Oh ! tasüba ne takokba kong ali ? O h ! tasüba ne temetakba kong ali ? Tsüngrem tenung sangang...Yisu Khrista-i tasüba temenen madak takok ngur shia aruogo" (1 Kor-15:53-57).
5. Yisu shia aruba ajanga pa ano tanaben arutsü teimla kaadaktsür. Yisu kodaki atudang; Tenyar ana nutsüngtem anasa nokdak aser ashi..."Galil nung Yisu shiba nenok nungi kodaki anir atur ; iba amajisa pa nenok ani-i tanaben arutsü" (T.Mapa-1:11).
6. Alima nung tsüngrem shinga shia aruba alima otsü nung mali...Saka asen kümtetdakba Yisu Khrista sur tanaben shia aru. Yisu shia maru asübo....Pa-a yimsu nguteter Ram Khrista, Muhammad, Gautama Budha, Guru Nanak parnok ka dang mesuka sula....Saka Yisu sur tanaben shia aruba ajanga....Pa dang tsüngrem-tem madak Tsüngrem ta ajar....Aser paji dang chichiba Tsüngrem lir.

"Haliluya ! Yisu shia aruogo" "Pa taküm lir"

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

India tesem ajaklen Good Friday nü Khristantemi sarasadema among



April 03, 2026 nü Manipur Baptist Convention Centre Church nung Good Friday anogomong nung tekülem sentong agidang tangokba noksa nung angur.

April 04, 2026: April 03, 2026 nü Good Friday anogomong nung India tesem ajaklen Khristantemi sarasadema amongba den külemi sentong balala ayongzuka agiogo.

Iba anogomong salem lemsatepa India tatong Tir, C P Radhakrishnan-i, Good Friday anogo nung nisung ajaki Yisu Khristai taküm tenla agütsüba bilemteter, ta metetdaksü.

Ato kilonser, Narendra Modi-i, iba anogomong ya Yisu Khristai taküm bendanga agütsüba anogomong lir; iba ya ajanga nüburtem rongnung yimjiyimjung, temeim aser tai toktep alitsü sarasademer, ta lemsatep.

Lok Sabha Speaker, Om Birla-i, iba anogomong ya Khristai taküm tenla agütsüba atema akhüm agütsüba anogo lir, ta shia nüburtem rongnung temeim aser tesünap aliba den külemi tamang jenjang tashi itshitsü ayongzük.

Manipur nunga Khristantemi Good Friday anogomong nung sarasadema, lumia aser tekülem

sentong agia among. Imphal nung aliba Manipur Baptist Convention Centre Church nung anepdang 7:00 ako nungi 9:00 ako tashi tekülem sentong agiba sülen lumia sarasadema liasü.

Manipur Baptist Convention Centre Church nung pastor, Zuankamang Daimai-i, Yisu Khristai taküm tenla agüja Kangki nung metaba ajanga meimchirtem temenen nungi alangzük aser tatem maka taküm agütsü, ta metetdaksü.

Mizoram state nungbo Brihostibar anogo nungi tenzuka Good Friday tashi nung Kibuba benjung densema sentong balala agia liasü. Hokolbarnü tekülem sentong nung osangtajung kentem aten, Yisu Khrista timtemba indang osang lemsatep aser yimdong süa kentena aser sarasadema jaja.

Tripura nunga tamangertem Tenla kidang adenshia sarasadema Tsüngrem külema amongba den külemi temeim aser tai toktep alitsü ayongzuka liasü.

Odisha nunga district aika

nung Khristantemi lumia sarasadema among. State yimtiba, Bhubaneswar, Cuttack aser Berhampur yimtitem nungbo Khristantem aika adenshia iba anogomong among.

Keralam nunga Arogotemi sarasadema among aser 'Kangki lenmang' omen nung tekülem sentong agia liasü. State yimtiba, Thiruvananthapuram nungbo lokti tulu adenshia iba anogomong sentong ayongzuka agiogo.

Maharashtra kübok Thane yimti nunga Khristantemi yimdong süa jaja, sarasadem, Yisu Kangki nung metaba jilushi saya aser tekülem sentong agia liasü.

Our Lady of Mercy Church züngsemtemi Yisu Kangki nung metaba jilushi ka gari lenmang nung saya. Khristantemi Little Flower School nungi tenzuka yimdong süa jaja aser St. John the Baptist Church nung tekülem agia sentong tembanga liasü.

ANOGO ABEN TSÜNGREM DEN

TSÜNGREM OCHI NUNG JAJATSÜLA

"Aser nenoki ochijt metettsi axer ochi jagi nenok nüchi kümdaktsütsü". - Yohan 8:32.

Ochi ya temulung lemtetba, tamang katetba, tajung aser tamajung, shitak aser tiyazü bendangtetbaji ochi. Ochi ya ajagi jembinür, ajagi ochi shir kümnür, ajagi ochi nung alitsü meranger saka aikadi iba ochi nung mejajateter. Ochi ya yimden nung, arogo, kibong nung aser kija takum shia dak alitsüla aser benschitetsüla. Nisung ka dak ochi ya melirabang pa/la taküm jenjangji tasü amai alitsü. Atangji Ochiba nung liang aser iba ochiba asenok mayoktsüla, mashioktsütsüla. Asenoki ochi tesayuba aser tangatetba nung dang amang, inyaka litetra iba ochi yagi asenok takok aser temoatsü nung anitsü.

Rom 3:4 nung "nisung shiaji yazür liaka, Tsüngrembo ochi ta metetang. Zülua aliba ama: Ne osangtem nung ochi ta sayutsü aoshi aser Ne obendangba nai akoktsü". Ochi ya asenoki meranga inyakba agi aahba masü, saka Tsüngrem ochi yabo asen mulungjang dak asoba agi ochiji katet. Anungji Tsüngremer sentong nung iba ochiba ya asen dak akatsü asoshi aser Pa den telungjem nung ochi agi alitsü asoshi: Tsüngrem oi sayuba ama alitsüla. Tsüngrem o nung ochiji metetsüla aser angatetsüla. Tsüngrem ochiji inyakteta sayutsüla. Ochi nung Tsüngremji külemtsüla. Yohan 1:17 "kechiyong ozüngji Mosa ajanga agütsü. Saka taochi aser ochiji Yisu ajanga aru".

SARASADEM:

Oh Tsüngrem, Tanü ne ochi agi anünga lir, Ne ochiji jungkai adokdakjang. Amen

YISU SHIA ARUBA ANOGO

- I.Yanger Jamir Signal Angami Village

Yisu asotsü putu aika lia bendangrertem lima nung Easter aser la otsü yamai ataloka liasü. Mapang ka nung entsü kanga tulu ka anüng nungi Euphratas ayong nung tsük. Ibaji angotemi ayongküm nung nungteta lia posütemi aji amok nung tsüngrem tetsür EASTER ji maktet. Laji Babylon nungeri külemba anüng chubatsürji liasü. La dangji Kaldi nungeri ESHTAR ta, English nungeri Easter ta, Syria nungeri ASHTAROTH ta aser Efesia nungeri DIANA ajar.

Yisu shia aruba anogo dang SHIA ARUBA ANOGO (Resurrection Day/LORD's DAY) ta ajatsüba sür nung reshikangshi aser lendong nungi jenbutsü asa-a limapur tsüngrem tenüng aja (English nungeri ajaba EASTER).

Israel nungeri Egypt nungi anitetba kümtettsü benjung April 2nd week tema nungi amonger, kasa mapang aser anogo tenjia Easter anogo amonger aser ESHTAR la ya (Kaldi nunger tsüngrem) entsü nungi maktet nung la birthday nung amshiba ama EASTER SUNDAY nung entsü amshir.

Yisu shia aruba anogo nung sayatenya tuluka atalokbaji "Pa shia aruba den külemi temeshipurtema aika shia aru" Mati. 27:51-52 Aser ajiang tenlaki teyindangba sü temalen nungi ali tonga ana küma shima aser monoknok anak aser lungtem jakma. Idangji lepertem lapok aser mejanga aoba temeshipur temang aika shia arudaktsü.

Anepdang ano züngia alidang, nungjang sangwa marudang An-i- makongdang sangwatsü mapang-a ta metetba ama shin o tem ataloka arudang amanga alirtem atema temoatsüba, kechiyong Lai o nung yamai shia lir. 1Tesalonikia 4:15-18 "Kechiaser Kibuba arudang asenok taküm alirtem kodakang tama makümtsü, kechiyong washiba agi tamarenba Tsüngrem jangzü ola agi Kibuba pei sasa Kotak nungi alutsü, aser Khrista nung asürtem tamasa shia arutsü. Idangji asenok anünga taküm alirtem anüng nung Kibuba den ajuruteptsü aser parnok den külemi mepet nung ayipa atutsü. Aser yamaji teti Kibuba den alitsü. Anungji item o agi nenok kati ka den süngzüktepang.

Easter Sunday : Kibuba Anogo (J.A.1:10)

- Rev. S. Temjen Longkumer, Chümoukedima.

Yisu shia aruba indang oren ishika agi lemsateper. Deobar anepdang yakta, anü adokli, Mari Magdalin, Yakob tetsü Mari aser Salomi parnok Yisu aremba leper jagi aru. Kibuba Kotak tenyar ka Kotak nungi alua, leper lung tuluji mekepdoker, iba manungji mena lia parnoki angu. Aser tenyar jagi tetsürtem dang ashi, "Nenoki Yisu bushir ta ni metet. Pa yangi mali, Yisui Pa masüdang ashiba ama atangji Pa asemnübuba nung shia aruogo, nenoki arua Pa mejangdak reprangang" (Mathi 28). Tetsübu, taoksa aser tepela tulu nung parnoki leper nungi ilungseta oyalia aoksa Yisu parnok dangi adok aser ashi, "Junga Liang". Tetsürtemi Yisu tetsüng nung sotta Pa külem. Idangji Yisui ashi, "Kü Adianutem (Nütsüngtem) dang Galili oang ta shiang aser idakji parnoki ni angutsü" (Mathi 28:10)

Yisu tasü nungi shia aruba indang kuli tejangja aika Laishiba nung agüja lir. Koba asenok ajaki metet. Saka ajak dang alia asenok asoshi TAJUNG kaji Yisu nütsüng temi Yisu shia aruba Anogo ya Pa külemba anogo ka asütsü ta mulungteta parnoki Amung Monga aru. Aser iba anogo nungjagi tenzuka iba temeshi tekülem mung ya maneni asenoki munga arur. Aser iba Yisu tanaben alimai maru tashi Pa dak amangbapurtemi meshiteta amungtsü tamang tangatetba nung lir. Iba tetezü tarokji asenoki angatetra, Deobar Kibuba Anogo ya meshiteta meyuiang malitsü. Iba tekülem sentep nung jangrabangra shilem agiba angudang, alima meimchirtemi Yisu shia aruba ochi kuliji asenok dak angutsü.

AO OSHI ANGAZÜKDAK:

TANÜ ANGAZÜKTSÜBA OJANG



Wara

(n) au aser süngküm nung aliba süngsangtem (bamboo branches)

* Aurong anasabo wara agi sadema mesenzüteter.

Warak

(adj) tetsür tesashi (rude woman)

* Tetsür warak den aikati putepa meliteter.

OLONG PAITEP # 7464

Grid for Olong Paitep # 7464 with numbers 1-15 in various cells.

TIPIEN

- 2. Sü jeplok - (4)
4. O agi merenshi - (5)
7. Ayongküm li - (5)
8. Chiyungtsü mapang süiadok - (4)
9. Tsüngrem den jembiba - (9)
12. Saklok - (4)
14. Samaba mebushitet - (5)
15. Mejanga onü - (5)
16. Tzü shiruru ka - (4)

LANGTSÜNGLEN

- 1. i - (4)
3. Kasa masü - (6)
5. Nüchi masü - (5)
6. Tashi endok - (5)
9. Langtem - (5)
10. Anü malidang - (6)
11. kibur - (5)
13. Tebur tembar tsüngda jatepba - (4)

OLONG PAITEP # 7463 TELANGZÜBA

TIPIEN :

- 1. Chikok, 5. Injung, 6. Keyi,
7. Ajeb, 12. Artsü, 13. Kilen,
14. Tasa, 17. Atepa, 18. Anatsü,
19. Moatsü.

LANGTSÜNGLEN :

- 2. Inyaktet, 3. Kija, 4. Ano,
6. Korang, 8. Joko, 9. Bilemtet,
10. Sentep, 11. Süks, 15. Anüm,
16. Enü.

NAI-A YA METETTER



London nungi arishi küm 95 tain Jane Asher-i world records pungu tashi ajatetogo. Asher-i taküm March ita item otsütem ajateta liasü aser iba ajanga la taküm piyong nung 100 Masters swimming records tema yanglutetogo.

Jane Asher ya International Swimming Hall of Fame nung züngsema lir aser lai tzüwatsü asoshi bendanga agütsüba atema British Empire Medal ka nguogo.

Asher ya shitakbabo Zambia nung aso saka la swimming career mapang US, New Zealand, Australia, Italy, France aser Spain nung liogo.

Asher-i mezüng Masters record angubaji 1986 küm swimmers over 25 atema liasü aser iba sülen la arishi küm 80 tashi nung 100 records nguteta liasü.

Meghalaya sorkari Elon Musk'er Starlink den sendakteper



Shillong, April 4, 2026

(Agencies): Meghalaya sorkari digital connectivity akangshitsü atema Starlink den memorandum of understanding (MoU) ka nung sign sütepogo. Starlink ya Elon Musk meyong satellite internet venture ka lir.

Iba tenangzüktep ajanga Meghalaya nung moutetba tesemtem tashi connectivity angutsü ta Chief Minister Conrad K Sangma-i ashi.

Centre-i India nung satcom services tenzüksü atema Starlink dangi shidi ka zülüogo saka iba licence atema criteria

ano magütsü lir.

"Meghalaya sorkar aser Starlink India süngda Letter of Intent (LoI) ka nung sign sütepogo. Iba tesentaktep yagi Starlink-i agütsüba satellite-based technology ajanga high-speed internet connectivity agütsütsü" ta Starlink-i metetdaksü.

Iba sentong nung Starlink nungi President & COO, SpaceX Gwynne Shotwell, Vice President, Starlink Business Operations Lauren Dreyer aser Country Head, Starlink India Prabhakar Jayakumar nunger aden.

Iba tesentaktep ajanga sorkari Meghalaya nung Starlink satellite-based high-speed internet connectivity tenzüksü. Iba ajanga state nung kinük ajaklen digital technology indang tajangzük atongtsü ta Starlink-isa metetdaksü.

Sorkari Shillong ya regional technology centre ka kümdaksünür aser Northeast nung IT aser innovation hub ka ama akümtsü maparen inyaker. Iba ajanga lanurtem nem maongka agütsütsü aser digital ecosystem tashi aittsü ta CM Conrad Sangma-i ashi.

Arunachal Pradesh nung ULFA-I züngsem ka temai adok

Itanagar, April 4, 2026

(Agencies): April 4, 2026 nü Arunachal Pradesh nung ULFA-I telungpur ka temai adokogo. Tirap district nung iba telungpuri sepaitem tsüngdang temai adok.

Iba nisung ya Jintu Gogoi (23) ta jangjaogo aser pa dang

Arun Asom ta-a ajar. Pa ya Sivasagar district, Assam kübok Hachara nungi lir.

Pai April 3 nü Khonsa nung Superintendent of Police office nung temai adok aser iba mapang police, Assam Rifles aser Central Reserve Police Force (CRPF) liasü.

Jintu Gogoi-i 7.65 mm Italian-made pistol den magazine ka aser injangtem bendanga agütsüogo.

Security forces-i telungpurtem dang ozüng alema inyaksangshiba toktsür temai adoktsü ajungmesoba maparen nung iba ya shilem ka lir ta ketdangsürtemi ashi.

Washington DC nung Manipuri Subika art sayutsü



Khongjomnubi: The Pleiades



The Odyssey of Poireiton



Senbi Paikhomba

Imphal, April 4, 2026

(Agencies): Manipur nung Subika Art ta ser sobaliba art form ka sama taoer lir aser iba art ya Meitei nungeri benshir.

Ajisüaka, Washington, D.C. nung exhibition ka agitsü aliba ajanga iba art form ya alimai tali meteta akümtsü.

May 9 nungi May 19, 2026 tashi Gallery 16Ten nung "The Revival of the Forgotten Art of Manipur: An Exhibition of Modern Subika Art" ta ser exhibition alitsü ta The Kolorbox and the Advanced Research Consortium Library & Archives-i metetdaksüogo.

Iba exhibition nung artist

Sapha Yumnam-i yangluba mapa 20 tema sayutsü. Yumnam ya Department of Fine Arts, Manipur University nung assistant professor ka lir aser pai Subika art asentenshir aser meyipzükshir.

Subika ya Manipur nungi balaka bulua manguba manuscript painting tradition ka lir. Iba art form ya Putu 18 buba aser 19 buba nung wazüka ayuba manuscripts lir aser astronomy, cosmology, divination, o ritual practices amala dena lir.

Item artworks ya handmade paper aser agarwood bark manuscripts nung yanglu aser

Meitei script tejenba nung zülü.

Yumnam-i Subika ya manuscript-based practice nungi contemporary art form ka kümdaksütsü asentenshir.

Iba exhibition ya ARCLA Director aser historian Wangam Somorjit-i acha-ayanger. Somorjit-i Manipuri manuscripts tejentem indang digital repository ka renemer aser iba nung Subika paintings densema lir.

The Kolorbox nung co-founder Priyananda Soubam-ia ashiba agi iba mapa ajanga Subika amala nisungi junga memetetba art forms ajungkettsü nükjiong lir.

Afghanistan nung menoknok anak; kibong ka nungi nisung 8 asü



Kabul, Rongchii/April 4 (Agencies): Afghanistan nung menoknok anakba sülen Kabul province kübok Gosfand Dara nung kibong ka nungi nisung ti süogo. Menoknok anakba mapang parnok aliba ki ya chirepa liasü.

Gosfand Dara otongdar Sharafat Zaman-i Honibarnü ashiba agi, iba kidang alirtem rongnung arishi küm ana tain tanur chanu ka dang jemboa liasü. Afghanistan indang disaster management agency-i ashiba agi, tanobusang ya-a yirua liasü.

5.8-magnitude tesashi menoknok ka agi Hokolbar aonung 8:42pm meta Afghanistan kübok tesem kar anakshitsü. US Geological Survey (USGS)-i ashiba agi menoknok epicentre ya Badakhshan province nung

liasü. Linük yimtiba Kabul ya epicentre nungi southwest len km 290 shi pilar lir.

Epicentre temeket nung aliba tesemtem nung nisung yiruba mesüra teraksatsüba adokdaksüba indang osang tejangja magütsü.

Afghanistan nung Kabul densema tesem balala aser India yimtiba New Delhi tashi nunga tremor tem ajangshiogo, ta Reuters-i metetdaksü.

Pakistan nunga linük yimtiba Islamabad aser Peshawar, Chitral, Swat aser Shangla nung ajak nung menoknok anakba ajangshiogo. Ajisüaka nisung yiruba aser ki-o-jen raksaba osangbo kecha mali.

Afghanistan ya mapangshia menoknok agi kongshir, kechiyong iba linük ya Eurasian aser Indian tectonic plates na

ajurutebpa anasa lir. Küm shia Afghanistan nung menoknok lendong nung nisung 560 shi asür.

Tawa menoknok agi tamajungtiba kongshibaji taoba küm liasü. Magnitude 6 tesashi menoknok ka agi Afghanistan anütoklen kongshiba sülen nisung 2,200 asü.

Asürtem ya timba Kunar province nungi liasü, kong Afghanistan nungertem süng aser ali agi yangluba kitem nung alir.

Afghanistan ya mapangshia menoknok aser yipru mopung lendong balala agi kongshir aser talisa kinük nung aliba tesemtem kanga timtema arudar.

Yimdam yimtsüngtem nung kitem ya longru, süng aser ali agi tashi meiti dang yanglur liteper aser iba ajanga takoksa aika ajangshir.

Iran-i opposition telok nungi züngsem ana tepset

Tehran, Rongchii/April 4 (Agencies): Iran-i tenokdangba agütsür aliba opposition telok People's Mojahedin Organization of Iran (PMOI/MEK) züngsem ana tepsetogo. Sorkar anemertem azüoktsü atema jenjang agia aruba nung iba ya tesüsabuba asütsü.

PMOI/MEK nung adenba aser kiralongrar inyakyim balala nung shilem agiba atema aitsür aliba Linük Supreme Court-i maneni agizüba sülen tena ya Honibar anepdang tepseta liasü.

"Abolhassan Montazer aser Vahid Baniamerian na obendangba den tena aitsür aliba ya Supreme Court-i agizükba sülen aletseta südaktsüogo," ta Iran judiciary website, Mizan Online-i Honibarnü metetdaksü.

PMOI/MEK-i Iran nungi chuba atsüngtoktsü atema 1979 Islamic revolution pusema liasü. Ajisüaka 1980s

nung parnok Tehran nung leirtem den meputei aküm aser parnok ya kiralongrar telok ka kümtsü. Iba sülen PMOI/MEK ya tanga linük nungi dang inyaksangshia arudar.

Kasa telok nungi aija alir parnok pezü March 30 aser 31 nü tepsetogo. PMOI/MEK website nung sangdong ka ajanga ashiba agi, item nisungtem ya Mohammad Taghavi, Akbar Daneshvarkar, Babak Alipour aser Pouya Ghobadi nung liasü.

Nisung trok prongla ya 2024 küm tatemlen Revolutionary Court kati aija liasü, ta PMOI/MEK-isa metetdaksü.

Iba telok yagi züngsemtem tepsetba ya aitsüogo aser April 2 nü sangdong ka ajanga ashiba agi, Tehran-i opposition tem azüoktsü merangba ya amajok lir.

"Tashiyim agi nisung tepsetba ajanga opposition

tem ajem ajema mekümdaktsütettsü; ajisüaka iba ajanga yimsüsürtem atsüngtoktsü atema Iran nung lanurtem taliang ajungmesotsü," ta PMOI/MEK-i ashi.

Rights telok temia item nisungtem tepsetba ya aitsüogo. Ken o balala nung nisungtem aija tepsetba atema Activist temi Iran aija arudar.

US aser Israel nati February 28 nü nungi Iran amak tenzükba sülen Tehran-i Kouroush Keyvani densema nisung aika tepsetogo. Keyvani ya Israel atema itangiarter mapa inyakba atema aija tepsetogo.

Kasa mapang nung longkak aitba mapang Israel aser US tenüng nung inyaksangshiba atema nisung ka Brehostibarnü tepsetogo.

March 19 nüa Saleh Mohammadi, Mehdi Ghasemi, aser Saeed Davoudi nung tepseta liasü.

MULUNGEN O




(17:03:1969 – 31:03:2026)

Ozü temeim kinungsü aser tsürabur Asen (Chungtiayimsen) shiranga aliba mapang aser la iba lima nungi pilar onok mangyim jashi timtem nung alidang, onok dang meima nübo, rongsen aser sarasadem agi yarirtem ajak dang onok kinungertemi kanga pelaba lemsateper.

La iba lima nung taküm aliba tesüsaba mapang tashi aria bilema, medemertem, kiyong-kidangertem, arogo, lokti tentet, doctor aser nurse-tem aser temeimertemi kanga meima yariba asoshi nenok ajak dang onok mulung ajak agi pelaba metetdaksür.

Tulusang Tsüngremi nenok temeim mapa tajung asoshi talubosa moajangma ta onoki sarasademtsür.

~ Temeim Kinungbo Supongjungshi (Merangkong), Kohima, Chirnur, Semchir, Anük-apang & Kinungertem.



SANGDONGER

Tanü 4th April 2026 anogo nung ni Mr. Jongpongsangba S/o. Late Y.Tali Mongro temulung temerük agi kija aser lokti ajak dang metetdaksür. Mr. Tekatiba Mongro, Artang Ward nung alir pai kija aser lokti dang Sen apua aliba ajak nung ni dena mali aser ni kecha memetet.

Anungji tarutsü nung timtem matoktsü asoshi Mr. Tekatiba-i apua aliba sen ajak nungji ni memetet aser matener-ta kija aser lokti ajak dang iba sangdong ajanga metetdaksür.

Russia-i Ukraine nung nisung pezü tepset

Kyiv, Rongchii/April 4 (Agencies): Russia-i anüng ajanga taoba ghonda 24 tsüngda northeast Ukraine amakba sülen nisung pezü tepset aser nisung 11 yirutsüogo, ta Kharkiv governor Oleh Syniehubov-i ashi.

Syniehubov-i Honibarnü sangdong ka ajanga ashiba agi, Russia-i Kharkiv yimti aser tanga jila aser yimtsüng 11 maka liasü.

Ano northeastern Ukraine kübok Sumy tesem nung Russia-i yokba drone ka agi ki ka dak kongshiba sülen tanur ka densema nisung 11 yirua liasü.

"Drone temi 16ben atongtepa tua sür aliba nisung aliba ki (Sumy tesem nung) ka amak. Kidang mi adokba sülen iba kidang alirtem anina liasü...Mi temsepogo," ta Ukraine State Emergency Service press office-i metetdaksü.

Ukraine Air Force-i ashiba agi, manger mesangwa tsüngda defence force temi Russia-i linük kübok tesem balalai yokba drone 286 nungi 260 bo nokdangogo.

Parnokisa, drone 11-i tesem 10 amakba mangaokogo aser item

drone tem khazüka yokba ya tesem trok nung ngutetogo, ta ashi.

Kasa mapang nung Russia nunga southern Rostov region nung nisung ka tepset aser nisung pezü yiruogo, ta iba tesem governor-i ashi.

Ukraine-i manger mesangwa tsüngda tzüküm nung aliba Taganrog yimti maka liasü, ta Rostov Governor Yury Slyusar-i Telegram ajanga ashi.

Slyusar-isa, yirur alirtem temang kanga mejungi lir. Parnok rongnung asem Russia nung aser ka bendanger lir, ta ashi.

Ano missile kati Slyusar nung "commercial facility" ka amakba sülen iba tesem nung mi adoka liasü. Iba tesem nungi nüburtem anin aser mi azükogo, ta paisa shisem.

Maneni drone teraksa agi Azov tzüyim nung bendanger wako songer aliba rong ka dak kongshi aser iba ajanga rong nung mi adokdaksü. Kasa mapang nung air defence temi Taganrog Bay aser tanga district tem nung drone tem khadangogo, ta Slyusar-i ashi.

Mongsenbai ward-i Mokokchung Inter-Ward Football Tournament-2026 takok marok benogo



7 Buba Mokokchung Inter-Ward Football Tournament-2026 champion Mongsenbai Ward asayartem aser tayongertem külemi tangokba noksa.

Mokokchung, Rongchii/ April 04(TYO) : 7 Buba Mokokchung Inter-Ward Football Tournament-2026, March 24 nungi tenzuka asayaba tanü Süngkomen Ward aser Mongsenbai Ward tsüingda nikonngang 1:00 Ako nungi tenzuka final asayaogo aser iba asaya Mongsenbai Ward-i goal 2-0 agi Süngkomen Ward kotteta takok marok benogo.

Ward anaprongla nungi asayartem takok angutsü terenemba nung ground-i ait aser ward anaprong nungi nübur aika adenshiba den football meimer nübur aika adenshia Imkongmeren Sports Complex nung 7 Buba Mokokchung Inter-Ward Football Tournament final asaya tenzük. Asaya

tenzük asayayonga aoba mapang minute 11 buba nung Süngkomen Ward nungi j.no-11 Lipoksunep yellow card achi. Iba sülen telok anaprongla kanga dang meranga asayatep saka telok katia goal magütsüteri anisüngzükba mapang agi.

Anisüngzük tanaben ground-i aita asayadang telok anapronglai goal agütsütsü merangtepa asayatepdang Mongsenbai ward nungi J.no-3 Sponglepba minute 45 buba aser pasa ano minute 75 buba ta nung yellow card ana achi aser ano par ward nungisa j.no-10 Ashish minute 94 buba nung yellow card achi.

Iba asaya nung Mongsenbai Ward nungi j.no 19 Imnatoshi-i minute 69 aser minute 99 nung

goal-2 yoktet nung iba goal-2 jagi Mongsenbai ward-i Süngkomen ward kotteta taküm 7 Buba Mokokchung Inter-Ward Football Tournament-2026 takok marok benogo.

7 Buba Mokokchung Inter-Ward Football Tournament-2026 nung jurila senpet agizükertem yamai liasü.

1. Highest Scorer- Imnatoshi (6 goals) Mongsenbai Ward
2. Best Goalkeeper – Imkongtemsü Artang Ward
3. Best Defender – Lanukaba Mongsenbai Ward
4. Best Midfielder – Lipoksüngba Süngkomen Ward
5. Player of the tournament – Imnatoshi Mongsenbai Ward.

Victor Wanyama asaya nungi anisüngzük



Victor Wanyama

Rongchii/April 4, 2026 (Agencies): Muthurwa nungi asayar shibai football asaya sabang tulutibatem nung linük timla bener ao, pa asaya nungi anisüngzükogo.

Kenya nunger rongnungi Premier League nung asayaba mezüngbuba asayar Victor Wanyama-i pa football asaya nungi anisüngzükba Hokolbarnü sangdongogo. Pa küm 20 shi kanga takok ngua asayaogo.

"Tanü ni football asaya nungi anisüngzükba sangdonger," ta Wanyama-i X nung zülutsü.

"Linük pezü, club trok, Muthurwa nungi punngang tulu aliba tebur chanu ka.., ni asayaba tesemi ayaoka aiba shia linük meraket bener asayaogo," ta pai ashi.

Nairobi nung kanga dang timtem tekangshi ajangshia intetba sülen Wanyama-i otsütsüsa asayatetogo.

Pa 2013 küm pound million 12.5 agi Southampton FC-i alizükba ya pa indang career nung pa asoshi dang masü saka Kenya nung football asaya atema kanga tongtibang mapang ka liasü. Iba club nungi season ana asayaba mapang pa 85 ben asaya aser iba sülen 2016 küm Tottenham Hotspur-i ao.

Spurs nung Wanyama ya fan temi kanga saklokba asayar ka aküm, shibai midfield nung asaya amokbanger asaya liasü.

Ajisüaka pa 2017 küm Wembley nung pre-season friendly ka asayaba mapang temekok yiruba sülen pa indang

career nung tetsükdaksü adoka liasü.

"Ni iba timtem mapang tatsüka anepalua aruogo aser tang asaya nungi anentsü mapang tongogo," ta pai Daily Mail dang ashi. "Kümtem tsüingda ni tashiba aika ajangshiogo, kechiyong ni asayaba position ya temela masü aser ni physical asayar ka lir," ta paisa shisem.

Iba sülen Wanyama ya MLS nung CF Montreal nungi asaya aser Dunfermline Athletic nungi mapang tatsüka asayaba sülen asaya nungi anisüngzüktsü telemteba agiogo.

International asaya nung pa Kenya team nungi 64ben asayaogo aser 2021 küm asaya nungi manen tashi pa linük team captain liasü.

Ajisüaka pa asoshi asaya nungi anenba ya tatemba kang masü saka tetenzük ka asütsü.

Wanyama-i UEFA B License agizükogo aser pa coach akümtsü asoshi tebilemba lir.

"Kü indang career nung taruba tapak lapoktsü asoshi renemba mapang ni UEFA A License agizüktsü aser coaching nung shilem agitsü," ta paisa shisem.

Gennaro Gattuso-i Italy coach mapatoktsüogo

Rongchii/April 4, 2026 (Agencies): FIFA World Cup 2026 atema qualifiers asaya nung Bosnia and Herzegovina mekoki tsükatokba sülen Italy head coach Gennaro Gattuso-i pa mapa toktsüogo.

Italy team World Cup asembuba atonga qualify mesüetba sülen Gattuso-i head coach mapa ya tokja liasü.

2018 aser 2022 World Cup atema qualify mesüetba sülen Gattuso, shibai 2006 World Cup akokba Italy team nung tongtibang shilem agia liasü, pai linük team ya taküm World Cup asaya atema qualify sädaktsütsü nangzuka liasü. Ajisüaka pai nangzükba ama team WC atema qualify mesüetba sülen pai iba mapa toktsüogo.

Anogo ka tejakdang FIGC tir Gabriele Gravina aser head of delegation, Gianluigi Buffon natia pei mapa tokja liasü.

Sport Minister Andrea Abodi-i mapa nungi anentsü ayongzükba sülen anogo ka lir Gravina-i pa mapa toktsüba sangdonga liasü.

"Italy nung football asaya ya tekübokba jenjang nungi anitetsü aser FIGC nung

temelenshi bener arua yanglushitsü nungdakba tejangja kümogo," ta Abodi-i ashi.

Italy team ya football asaya nung kanga dang takok tajung anguba linük ka lir, saka tang maksü tulu ajangshiba sülen arishi küm 72 tain Gravina-i pa mapa toktsüogo. Mezüngbo pai pa tarutsü atema telemteba agiba ya taruba hopta FIGC board senden ka amenba sülen sangdongtsü renemer liasü.

FIGC-i ashiba agi, tir tasenba atema election ya June 22 nü agitsü.

Gravina ya 2018 küm October ita FIGC tir asütsü shim aser pai Carlo Tavecchio melenzük, shibai Italy team mezüngbuba World Cup play-off nung Sweden makokba sülen mapa tokja liasü.

Gravina tir asüba mapang Italy team-i 2020 küm Euro akok. Iba küm Roberto Mancini-i aniba team yagi Wembley nung England koka iba asayamung tanabenbuba koka liasü.

Ajisüaka World Cup ana tashi atema qualify mesüetba sülen Gravina-i mapa toktsütsüsa aküm.

Para World Series Final nung Payal Nag-i Sheetal Devi kokogo



Sheetal Devi & Payal Nag

Rongchii/April 4, 2026 (Agencies): Bangkok Archery Para Series 2026 nung Honibarnü tetsür Compound final nung India tsür Payal Nag-i reigning world champion Sheetal Devi koka gold medal nguogo.

India tsür ana final asaya nung ya arishi küm 18 tain Payal-i kanga süngjema asayateta 139-136 agi asaya akok, koba la asoshi international asaya nung mezüngbuba gold medal liasü.

Arishi küm 19 tain Sheetal-i tawa iba asaya amokbanger asaya arudar aser tawa-ang la nem World Archery's Para Archer of the Year naroküm agütsüogo, saka final asaya nung lai Payal mekottet.

Sheetal-i Bangkok nunga asaya kanga junga tenzük aser qualification round nung lai point 698 ngua tanabuba jenjang nung alila Kazakhstan tsür Zhanat Aitimova dang nungi point 20 agi timba liasü. Payal-ia point 678 (9X) ngua la tasembuba jenjang nung

tembanga liasü.

Asayar anapronglai knock-out round nung kanga junga asayaogo. Sheetal-i semifinal nung Singapore tsür Nur Shahyidah Alim 147-142 agi akok aser Payal-i Aitimova 144-140 agi koka liasü.

Ajisüaka kanga dang tongtibang mapang nung Payal-i kanga junga asayateta la indang career nung takok tulutiba ngutetogo.

Bangkok nung India nunger asayartem kanga junga asaya arudar. Tebur compound kija asaya nung Shyam Sunder Swami-i bronze medal angu. Pai külem India nunger asayar Rakesh Kumar koka liasü.

W1 tetsür category nung Anjum Tanwar-i bronze medal asaya mekotteti pezübuba nung tembanga liasü.

Payal aser Sheetal na tetsür compound team final Kazakhstan den asayatsü aser Sheetal aser Toman Kumar na Indonesia den tarep temeyoktep asaya final asayatsü.

BILEMDANGANG

"Yisu shia aruba ajanga meimchir ajak nem timla agütsür."